



هلالي ٢ ♥

الحمد لله بعد نجاح الجزء الأول وانتشاره وكثير
من الناس استفادت منه فقررت اكتب الجزء
الثاني بس مع بعض التعديلات في طريقة
الكتابة..

وإن ضاقت عليك الأركان ف ركن الله باق لا يضيق

اهداء

إلى كل من يذنب ثم يعود إلى الله تائباً

منة الله محمد

نجمة : سيبي افكر يا هلال.

= خدي وقتك يانجمة عايزك تعرفي اني عمري
ماهفكر اوجعك وهاشيلك جوا عيني والله أدى لنفسك
فرصة.

- تمام انا هامشي دلوقتي.

= تمام خلي بالك من نفسك في رعاية الله

- في رعاية الله

بعد مامشيت نجمة هلال حس انه فعلا بيحبها ومش
عايز يشوفها كدا ابدًا وبرغم انه مش جاهز للجواز
دلوقتي اتقدم لها بس عشان يثبتها انه غير كل الشباب
وتقدر تحبه وتفتح قلبها ليه بس هو حاسس انه ابتدي
غلط عشان كدا هو خايف من رد فعلها.

مشيت نجمة وهي مزهولة من اللي سمعته مش عارفة
تعيط ولا تفرح هي كانت عارفة بس كانت بتكذب
نفسها هي كدا حست انها هاتخسر هلال كصديق

وحست انها ممكن تخسره للأبد راحت علي فاطمة
علي طول وحكتلها كل اللي حصل..

فاطمة : طب انتي حاسة ب ايه؟

مش عارفة احدد احساسي يافاطمة انا عايزة اعيط.

=

فتحت فاطمة دراعتها لنجمة.

نجمة دخلت جوا حضن فاطمة وفضلات تعيط وفاطمة
ماتكلمتش لأنها عارفة نجمة لما تكون في الحالة دي
وكمان هي قالتها أن هي عايزة تعيط عارفة انها
بتكون محتاجة حضن تعيط فيه وبس..

ارتاحت نجمة شوية وقامت من حضن فاطمة بعد
ماخلصت عياط.

_ ارتاحتي؟

= اه

_ كملي

نجمة :بصي انا كنت عارفة بس كنت بكذب نفسي
مش عايزة اخسره كصديق اي نعم هي مش صداقة
اووي يعني بس ديما لما بحتاجه بلاقيه بحس فيه أنه
خايف عليا كأني بنته وحابة الحاجة دي جدا بس خايفة
يطلع زيهم.

فاطمة : مع اني عارفة حكاية كريم بس يا نجمة انتي
عارفة انك كنتي غلطانة ودا شيء طبيعي يحصل لحد
كان في سننا وبعدين انتي مكنتش تعرفيه هو كويس
ولا لا بس هلال عارفين انه كويس جدا.

نجمة : انا عارفة اني غلطانة في موضوع كريم بس
خلاص عرفت وبعدت وان شاء الله اللي هيكون من
نصيبي هاحكيه ع كل حاجة.

فاطمة : طب هاتعملي اي في موضوع هلال

نجمة : هاعمل استخارة واقول لماما.

فاطمة : وابقى طمئيني.

نجمة :تمام حاضر

وبعد مخلصوا كلام راحوا الكافيه اللي في الكلية
وهما داخلين نجمة لمحت هلال.

نجمة : مش داخلة.

فاطمة :ليه؟؟

نجمة : كدا هارووح عشان تعبانه شوية

فاطمة : طب استنى اوصلك

نجمة :لا ماتخفيش انا كويسة يلا في رعاية الله.

فاطمة : في رعاية الله

هلال راح الكافيه اللي في الكلية عشان يشرب قهوته
وبردو كل شوية بيحاول يتصل على محمد مش
بيرد.

: ازيك يا هلال.

هلال : اهلا يا حمزة الحمد لله بخير انت عامل اي؟؟

حمزة دا شخص محترم جدا في سنة تانية ملتزم جدا
يمكن اكثر من هلال شويتين بيحب هلال جدا لكن
مش قريب منه لانه مش حابب محمد وهو ديما
بيشوف هلال قريب من محمد.

حمزة : الحمد لله ياهلال ديما يارب تكون بخير
هلال : اللهم امين واياك

حمزة : مالك شايفك قاعد لوحدك وبصراحة بقالي
فترة حاسس انك متغير وفيين محمد؟

هلال : والله مش عارف محمد فين بقاله اكثر من
اسبوع مش بيحي الكلية وبحاول أكلمه مش بيرد

حمزة : خير خير ماتقلش بس ابقى طمني عليه المهم
انت مالك؟

هلال : بصراحة يا حمزة انت شخص كويس جدا وانا
مش هاتردد اني احكيك .

حمزة : اتفضل ياهلال سامعك يمكن اقدر اساعدك.

هلال : بصراحة في بنت هنا كانت في الأول لبسها
للأسف مش زي لبس حافيدات عائشة يعني زي لبس
بنات اليومين دول بس بصراحة كان محترم ف
اتعاملت معاها مرة واحدة كان فيه حد بيضايقها ف
ساعدتها بصراحة بعد ماروحت من اليوم دا فضلت
أقيم الليل عشانها مش عارف ليه!؟
وحكاه على كل حاجة بالتفصيل

وبس لما قولتلها اني عايز اتجوزها حسيتها زعلت
بس حقيقي انا فعلا بحبها ورغم أن ظروفني
ماتسمحش اني اتقدملها دلوقتي بس اتقدمتلها عشان
اثبتلها اني غيرهم واني بحبها وعمري ما هز عليها
وناخذ بعض للجنة وعشان مغضبش ربنا بس حاسس
اني غلطت وربنا هايعاقبنى.

حمزة :كويس انك عارف انك غلطت عارف الغلط
فين!؟

هلال : اني قربت منها مش في الحلال

حمزة : تمام هو دا انت لو كنت فضلت حابس حبك
ليها لغاية ماظروفك تسمحلك انك تتقدملها بس عمنا
انت يعتبر صلحت الغلط بأنك اتقدمتلها بس غلطت في
حاجة تانية انك اتقدمتلها هي كان لازم تصبر وتروح
لأهلها الأول وأهلها هما اللي ياخدوا رأيها.

هلال : فعلا انا غلطان بس مكنتش قادر اشوفها مشتتة
كدا واسكت انا ندمان جداا حقيقي يارب ماتعاقبنيش
فيها..

حمزة : روح لربنا ياهلال محدش فينا هايقدر يساعذك
غيره انت عارف انك غلطان روح وصالحه وهو
عارف انك ندمان.

هلال :مش عارف اشكرك ازاي حقيقي انا هاعمل كدا
محتاج اتكلم مع ربنا فعلا شوية.

حمزة :ربنا يبسرلك الأمور ياهلال وتبقى من نصيبك
بس عايز اقولك ع حاجة مش معنى انت بتحبها يبقى
تقول لأصحابك لازم تحافظ عليها لغاية ماتبقى
حلالك

هلال :حاضر والله انا مش قولت غير لمحمد وانت
عشان كنت حاسس انك هاتفديني وظني طلع في
محله.

حمزة :ربنا يهديك ويهدينا جميعا يا هالولة.

هلال : حبيب هالولة والله.

حمزة :ايوا كدا فكها كدا يا أبوا حمزة.

هلال : حبيبي يا ابو هلال.

حمزة :لأ ماتفقناش على كدا.

هلال: يعني انا اللي اتفقت على كدا؟

حمزة :خلاص هاخليها عليا المرة دي وهاسمي اسم
ابني على اسمك.

هلال : ايوة كدا ياابو هالولة.

حمزة :امشي ياض من هنا هو اللي هاعمله فيك
هايطلع عليا انا وابني ولا اي؟!.

هلال :افعل يا ابن آدم كما شئت فكما تدين تدان

حمزة :مردودالك يا ابوك حميبيز.

هلال :طب قوم يا حمير من هنا.

وفضلوا يهزروا ويضحكوا وبعدين هلال قال..

_ انت تقريبا يا حمزة بقيت قريب جدا مني وعارف حاجات كثير عني إنما أنا مش اعرف اي حاجة عنك.

حمزة : بص ياسيدي انا اسمي حمزة ياسر أحمد في كلية تمريض سنة تانية نفسي اكون داعية جدا والذي متوفي ووالدتي عايش معاها هي واخويا في تالته ثانوي

هلال : ربنا يرحمه ويعينك..

حمزة :اللهم أمين واياك

هلال :طب ما فكرتش تتجوز؟

حمزة :انا بشتغل في مستشفى خاص وحالي يسمح اني اتجوز بس مستنيها.

هلال : هي مين؟

حمزة : حور عيني.

هلال : اي الأغاز دي بقي شكلك واقع.

حمزة : انت حاكتلي عشان افيدك لكن انا ماحدث
هايفدني في موضوعي غير ربنا ياهلال
هلال :ربنا ينولك اللي في بالك يا حمزة

حمزة :اللهم امين

هلال :مش يلا بقى.

حمزة :يلا أبو الهلاليل.

هلال :يلا يا ابو الحمامييز.

روح هلال البيت ودخل باس رأس أمه وفضل قاعد
معاها شوية ودخل يطمئن على أخته أميرة اللي في
ثانوية عامة

هلال بيخبط على الباب : ممكن ادخل؟

أميرة وهي تبتسم :دانت تدخل وتجيب ناس تدخل.

هلال :اي يابت الكلام اللي انتي بتقوليه دا في بنت
محترمة تقول كدا؟

أميرة وهي باصة للأرض : اسفة بس بهزر معاك
وبسمها كثير من صحابي.

هلال :مش كل حاجة نسمها نقولها يا أميرة وبعدين
حلاوة البنت في الحياء يا حبيبي وبعدين متأسفيش
خلاص حصل خير يا حبيبي.

أميرة وهي بتحضنه :انت عامل اي وحشتني
هلال :وانتي اكثر يا قلبي والله عاملة اي في المذاكرة؟
أميرة :الحمد لله بس حاسة اني مخنوقه بقالي كثير
بذاكر وزهقت

هلال :طب بقولك اي وراكي دروس النهاردة؟
أميرة : لا يا حبيبي

هلال :طب يلا قومي البسي عشان نخرج.
أميرة :بجد الله ربنا يحفظك ليا يا هلال بحبك اوووي
هلال :ويحفظك يا قلبي بحبك اكثر يلا قومي بقي.

دخلت نجمة بيتها وباست مامتها وقعدت معاها شوية.

نجمة:ازيك ياماما

والدتها :ازيك يا قلب ماما عملتي اي في الكلية
النهاردة

نجمة :الحمد لله ياماما عايزة احكيك على حاجة.

والدتها :سمعكي ياروحي

نجمة :فاكرة الشاب اللي كنت حكيالك عنه!

والدتها :ايوة يا حبيبتي

نجمة وبدأت تحكيها كل اللي حصل.

والدتها :انتي عايزة اي؟

نجمة :مش عارفة يا ماما حاسة اني لسه صغيرة

ومش هاقدر أقرر دلوقتي أو خايفة اخد قرار زي دا

والدتها :بصي يانجمة من اللي انتي قولتية ف انا

شايفة انه محترم جدا وعايزك في الحلال ومش عايز

يغضب ربنا عشانك.

نجمة :مممكن تكون دي حقيقة بس انا خايفة يا ماما

والدتها :من أي يا قلب ماما؟

نجمة: مش عارفة بس بحس ان الشباب كلهم انانيين
بحس انهم بيتجوزا اللي بيحبوهم عشانهم هما مش
عشان احنا فارقين معاهم بحس انهم بيتحوزوهم
عشان يوفوا بعهدهم بس ويثبتوا لنفسهم أنهم رجالة
وقد الكلمة انا عايزة حد يكون عايزني يا ماما وياخذ
ب ايدي للجنة.

والدتها: وانتى شايفة دا في هلال؟

نجمة: معرفهوش اووي انا مش بشوف منه غير كل
كويس لكن مشوفتش منه موقف وحش عايزة اعرفه
اكثر.

والدتها: طب اعلمي استخارة الأول وشوفي انتى
ارتاحتى ولا لا ولو ارتاحتى تقعدو مع بعض ونشوف
بقى اي اللي هيحصل.

نجمة: تمام يا ماما

دخلت نجمة الأوضة بتاعتها وغيرت هدمها وصلت
العصر وفضلت تدعي كتير

نجمة :يارب انا عارفة اني غلطانة اووي وعارفة اني
ممکن اكون وحشة وممكن تعاقبني انا اسفة يارب
سامحني انا اسفة يارب دلني للطريق الصح انا بقيت
بخاف جدا من العلاقات ومش عايزة أقرب من حد
مش عايزة اتكسر تاني مش عايزة يطلع زي كريم
مش عايزة يكون دا عقاب غلطتي يارب سامحني
وفضلت نجمة تعيط كثير لغاية ماصدعت ودخلت
نامت..

فاطمة بعد ماروحت دخلت لماماتها وقعدت معاها
شوية ودخلت الاوضة بتاعتها
فضلت تفكر في نجمة وفي موضوعها وبعدين فضلت
تفكر انها تتغير

فاطمة لنفسها :انا زهقت من حياتي دي مش عارفة
عايشة مش سعيدة ليه طب نجمة عندها مشاكل كثير
وسعيدة اهي يمكن عشان قريية من ربنا!

اكيد طبعا هو حد يطول يبقى قريب من ربنا يابختها
انا نفسي اتغير جدا بس مش عارفة اخذ الخطوة دي
يارب ساعدني..

وبعد مافضلت تفكر اتصلت بنجمة وكانت الساعة 8
بليل..

فاطمة: الو يانجمة

نجمة: ايوا يافاطمة في حاجة؟

فاطمة: كنت عايزة اتكلم معاكي شوية ممكن اجيلك؟

نجمة: انتي بتستأذني انتي عبيطة!

فاطمة: طيب تمام نص ساعة وهاكون عندك

نجمة: وانا مستنياكي.

لبست فاطمة ونزلت راحت لنجمة

الباب بيخبط

نجمة: اكيد دي فاطمة

فاطمة: ازيك

نجمة :الحمد لله انتي عاملة اي مالك ادخلي.

فاطمة و اترمت في حضن نجمة وفضلت تعيط

نجمة :اهدي يا حبيبي بس

بعد ما فاطمة خلصت عياط وارتاحت شوية

فاطمة:انا تعبت يا نجمة حاسة ان ربنا زعلان مني انا
وحشة اوووي

نجمة :زعلان منك صالحيه وبعدين كفاية انك حسيتي
انك مذنبه دي حاجة حلوة

"مجرد التفكير في التوبة.. توبة"

يعني انتي بتفكري انك تتوبي ف دي لو حدها توبة
يا حبيبي

فاطمة :ساعدينني أقرب من ربنا.

نجمة :اكيد يا حبيبي بصي انتي بتسمعي كلام مامتك
ليه؟

فاطمة :عشان بحبها ومش عايزها تزعل مني

نجمة **"عبدني لما جعلتني أهون الناظرين إليك"**

فاطمة :يعني اي؟

نجمة :يعني انتي بتخافي أن مامتك تزعل منك ومش
بتاخفي أن ربنا يزعل منك؟

بصي انتي ناوية تتغيري فعلا..

فاطمة :ايوا..

نجمة :تمام نبدأ باللبس لأن انتي نويتي انك تغيري من
نفسك ف لبسك هاساعدك على كدا وعايزة اقولك
حاجة

لبسك مش بيعبر عن أخلاقك بس أخلاقك هي اللي
بتختار لبسك..

فاطمة :فاهمة..

نجمة : نبتدي الأول بالبناطيل هانبطلها

فاطمة :تمام

نجمة :توبي من كل ذنب من قلبك واعزمي انك مش
هاترجعيله تاني زي سماع الاغاني..

فاطمة :تمام بس لو في ذنب زي سماع الاغاني مش
هاقدر ابطله

نجمة :شوفي اكثر وقت بتسمعي فيه الاغاني امتى
وحاولي تشغلي نفسك فيه.

واستبدلي الاغاني بالقرآن طول مانتي قاعدة اسمعي
قرآن حتى لما تيجي تسمعي اغاني بعد كدا قلبك مش
هايطاوعك لأنه هايكون اخذ على القرآن

"الاغاني والقرآن لا يجتمعان في قلب واحد"

فاطمة :تمام انا حاسة اني مبسوفة اووي

نجمة :وهاتتبسطي اكثر لما تقربي اكثر والله قربه حلو
جدا بينقي قلبك والله

فاطمة:الله

نجمة :شوفتي ازاي..

فاطمة:اه انا ارتاحت جدا يلا بقى هقوم امشي

نجمة :يابت اقعدي نحضر العشا ونتعشا سووا

فاطمة :لايا ستي اروح اتعشي مع ماما حبييتي
نجمة :ااه يامصلحجية..

فاطمة :معلش بقى مرة ثانية

نجمة :ماشي ياختي يلا فى رعاية الله

فاطمة :فى رعاية الله

نزلت فاطمة من عند نجمة وهي ناوية تتغير وفرحانة
جدا انها هاتقرب من ربنا وقلبها فرحان جدا دخلت
البيت لقت ماماتها نائمة راحت باستها ودخلت نامت..

هلال فسح اخته واميرة بقت فرحانة جدا انها خرجت
وغيرت جو ومبسوطة اووي وجبلها بلالين.
أميرة :انا بحبك اووي ياهلال..

هلال :وأنا كمان بحبك جدا يا اميرتي

أميرة :يابخت مراتك بيك والله

هلال :يابكاشة يعني انا هبقي زوج كويس؟

أميرة :والله انت لو مش اخويا كنت اتجوزتك

هلال :أن شاء الله يالمضة يجيلك اللي احسن مني

ويظبتك وماتفتكر نيش اصلا

أميرة :لا طبعا مفيش احسن منك ياخويا

هلال :لا فيه بس انتي ماشوفتيش

أميرة :اديني قاعدة مستنية اهو يا اخويا

هلال :مستعجلة على أي يا موكوسة خلصي تعليم بس

الاول

أميرة :ياعم مانا صابرة اهوو

هلال :اي البت دي؟

أميرة :مش عاجبك طلقني

هلال انتي هاتدبسيني ولا اي؟

أميرة :انت خلاص ادبست يا باشا.

هلال :بت يا أميرة.

أميرة :قلب أميرة

هلال :ماخلاص بقى كدا تغير عليا.

أميرة :اوبا هي مين دي ي هلال؟

هلال :احم بصي ياستي

أميرة :بصيت

هلال :انا بحب واحدة وعازب اخطبها بس هي
ماتعرفش اني بحبها ومش ناوي اقولها الا لما اخطبها
بس انا قتلها اني عازب اتقدملها وهي لسه بتفكر

أميرة :امم هي اسمها اي؟

هلال :نجمة

أميرة طب ماتديني رقمها أو حتى عرفني عليها.

هلال :اولا معيش رقمها ثانيا ليه؟

أميرة :يعني هاشوفها شيفاك ازاي وكدا؟

هلال :طيب هبقي اخذك معايا الكلية بكرة ان شاء الله
أميرة :تمام

وهما ماشين هلال شاف محمد واقف بعيد على البحر
هلال :استنى كدا يا أميرة.

أميرة: رايح فين؟

هلال :تعالى بس اقفي هنا انا جاي ع طول
أميرة :ماشي

هلال :محمد..

محمد بص وراه وشاف هلال

محمد :ازيك يا هلال

هلال :الحمد لله انت عامل اي واحشني جداا مش بترد
على تليفونك ليه؟ ومش بتيجي الكلية ليه؟

محمد :معلش عندي ظروف.

هلال :اي محمد مالك؟

محمد وببيدمع :والدي اتوفى يا هلال.

هلال وخذ محمد في حضنه: لا حول ولا قوة الا بالله
الله يرحمه ويغفر له اهدي يا محمد

محمد وبدأ يعيط :انا تعبان اوي مش قادر اكمل اي
حاجة في حياتي

هلال :استنى اوصل اميرة البيت واجي اقعد معاك

محمد :طب روح انت

هلال : ماتمشيش انا جاي على طول

مشي هلال وراح يوصل أميرة ورجع تاني لقي محمد
لسه مكانه..

هلال :اتاخرت عليك؟

محمد: لا

هلال: بص يا محمد الموت دي حقيقة مؤلمة بس لازم نواجهها ومانعترضش على حكمة ربنا انت بتقول مش قادر اكمل حياتي من بعده لا لازم تكمل لأن دا مش هاينفعك ولا هاينفعه اكر حاجة ممكن تنفعه هي الصدقة والدعاء واعمل لنفسك بردو اتعظ لأنه كان النهاردة معانا بكرة بقى عند ربنا لازم نعمل حساب لليوم دا ياترى هانكون جاهزين نقابل ربنا ولا لا

محمد: حاضر يا هلال بس أقف جنبى انا حاسس انى هلكان

هلال: تعالى نقرب من ربنا يا محمد..

محمد: ساعدني خد ب ايدي

هلال: طبعا بس انت أنوي انك هاتقرب

محمد: هاتقرب أن شاء الله

هلال :طب يلا روح صلى كدا واجهز علشان

هانروح الكلية بکرا ان شاء الله

محمد :أن شاء الله

وروح محمد وهو مرتاح شوية وجهاز نفسه انه يروح
بکرا الكلية

دخل هلال البيت ودخل الأوضة بتاعته وفضل يفكر
في حال محمد وبعدين فضل يفكر في نجمة وفضل
يدعي انها توافق لغاية ما نام

وجيه يوم جديد والكل قايم نشيط ومتحمس

نجمة قامت من النوم وصلت وبعدين فطرت وراحت
الكلية

فاطمة قامت من النوم وصلت وفطرت وراحت الكلية
وهي ناوية انها تنزل تشتري لبس هي ونجمة

هلال قام من النوم وصلى

هلال :يلا يا أميرة انا رايح الكلية هاتيحي معايا ولا
لا؟

أميرة :يلا يا باشا مصر جايا حالا بظبط الخمار

هلال :اعبال النقاب يا حبيبي

أميرة :أن شاء الله بس ماتقطعش بس

هلال :اقاطع ليه يا اختي انا اطول؟

اميرة :يلا بس ونبقى نلبسه انا ونجمة مع بعض

هلال :ياااه دا يبقى احلا يوم في عمري

اميرة :عد الجمائل بقى

هلال :طب يلا

ونزل هلال واميرة وراحوا الكلية وهلال مبسوط

محمد صحي من النوم وصلى ونزل الكلية وهو عايز
يتغير

في الكلية نجمة كانت قاعدة في الكافيه مستنية فاطمة
بعد شوية فاطمة دخلت عليها

نجمة وهي بتحضنها :حبيبي اللي واحشني

فاطمة وهي بتضحك :وحشاني جدا بقالنا بتاع 5

ساعات مش شوفنا بعض

نجمة :طب تعالى نفطر يلا

فاطمة :يلا يا اختي

وصل هلال الكلية ومعاه أميرة

أميرة :فين نجمة بسرعة.

هلال :اهدي ياختي عشان مش عايز ارفع بصري
بس استنى

أميرة :اشطا ربنا يقوى إيمانك

هلال وبدأ يدور بعينه بسرعة كدا عليها

هلال :هناك في الكافيه هاتلاقيها لابسة خمار زيك

أميرة :تمام

هلال :هاتعملي اي؟

أميرة :ملكش دعوة انت.

هلال :بت يامجنونة انتي مش عايز مشاكل

اميرة :انا بردو بتاعت مشاكل ياهلول؟

هلال :امشي يابت من هنا روجي شوفي انتي راحة

فين

أميرة :راحة لنجمتك.

هلال:براحة عليها يابت

أميرة :ايوة بقى

هلال :امشي يابت من هنا

أميرة :ماشي

مشيت أميرة وراحت عند نجمة وفاطمة

أميرة :السلام عليكم ورحمة الله وبركاته

نجمة وفاطمة :وعليكم السلام ورحمة الله وبركاته

أميرة :اولا مش عايزا كوا تستغربوا بس انا اخت

زميل معاكوا هنا وهو واقف مع أصحابه ف قالي

اروح اقعد في الكافيه ف لقيتكم ممكن اقعد معاكم؟

نجمة :طبعا يا حبيبي افضلي.

أميرة :شكرا جدا

نجمة :اسمك اي؟

أميرة :اسمي أميرة

نجمة :اسم على مسمى ياروحي اسمك حلو جدا

اميرة :بجد تسلمي بس انتي جميلة خالص اول

ماشو فتك قلبي اتفتحك كدا والله

نجمة :حبيبيتي

فاطمة:وانتي بقي في سنة كام يا أميرة

أميرة: في تالته ثانوي صحيح انتي اسمك اي؟

فاطمة :اسمي فاطمة ياجميل ودي نجمة

أميرة :الله انتوا حلوين اووي انا عايزة نبقي أصحاب

نجمة :اكيد طبعا ياجميل

أميرة :طيب دا رقمي وخذت ورقة وكتبت عليها
رقمها

نجمة :تمام ياجميل نتكلم على الواتس بقي

أميرة :ماشي وانا كل ماجي مع هلال هاجي اقعد
معاكو

نجمة واتكسفت :اه ان شاء الله

أميرة :صحيح انتو تعوفوه؟

نجمة :مين دا؟

أميرة :هلال.

نجمة : اه زميلنا.

أميرة :وياتري بقى شاطر ولا فاشل؟

نجمة :شاطر يا حبيبي واشطر مني كمان

أميرة :اي دا ازاي؟

نجمة :يعني محترم جدا جدا وشاطر في الدراسة وفي
العملي ممتاز بصراحة

أميرة :فعلا هو بردو في البيت شاطر.

نجمة :شاطر ازاي؟

أميرة :يعني بيساعدني في الدراسة وفي شغل البيت
عشان ماما تعبانة شوية وكدا

نجمة :ربنا يشفيها ويعافئها يارب ويحفظلك اخوكي

أميرة :اللهم امين

دخل محمد الكلية وقابل هلال.

هلال :اي محمد ازيك ياعم ليك وحشة والله الكلية
مكنش ليها طعم من غيرك

محمد :اه مانا جاي عشان السكر شاح في البلد وكدا
ف قولت احن عليكوا

هلال :دمك ثقيل بردو

محمد :متشربوش

هلال :امشي يلا

محمد :خلاص خلاص... عامل اي من غيري؟

هلال :عامل خط وماشي عليه

محمد :لا والله كمان دانت بقيت خبرة اهو

هلال :مش صاحبك؟

محمد :ايوة كدا... بقولك عايزك تساعدني اقرب من
ربنا ياهلال

هلال :اكيد طبعا تعالى نقعد

محمد :ماشي

وراحو يقعدو في الكافية لقوا حمزة هناك

حمزة :اهلا يا هلال اهلا يامحمد فينك؟

محمد وهلال :ازيك يا حمزة

حمزة :الحمدلله بخير.

محمد :كان عندي ظروف والدي توفي

حمزة :ربنا يرحمه ويغفرله ويسكنه فسيح جناته اللهم
امين

هلال ومحمد :اللهم أمين

هلال :بصوا يا شباب انا عايز اعمل حاجة تقربنا من
ربنا وعايز كلنا نساعد بعض

حمزة :فكرة جميلة جدا

محمد :تقريبا انا اكثر واحد محتاج

هلال :تمام احنا بعد كل محاضرة نقعد نص ساعة احنا
الثلاثة بس هنا عشان مايقولوش تجمع وبتاع ونفضل
نتكلم عن ربنا ونتكلم عن عادات نعملها ونشجع بعض

ونعمل حلقة استغفار اللي هو كل ماتكون فاضي
أفضل استغفر

حمزة :تمام جزاك الله خيرا يا هلال

محمد :تمام وانا معاكوا

نجمة:طب بصي يا أميرة احنا هانطلع عشان عندنا
محاضرة بقى

اميرة :ماشى يا حبيبتى انا هشوف هلال كدا

نجمة :ماشى يا حبيبتى ابقى كلميني بقى

اميرة :ماشى هاعمل جروب لينا انا وانتى وفاطمة
ونتكلم عليه.

نجمة :بس بعد الامتحانات عشان دراستك

اميرة :ماتخفيش انا مظبطة وقتي

نجمة :تمام

أميرة :يلا اطلعوا

نجمة وسلمت عليها :في رعاية الله

فاطمة :في رعاية الله

أميرة :في رعاية الله

هلال ومحمد وحمزة فضلوا يتكلموا شوية

هلال :يلا بقى عشان نطلع المحاضرة يامحمد

محمد: يلا

حمزة: تمام وزى ماتفقنا كدا

هلال: أن شاء الله

ومشي هلال ومحمد هلال اتصل على أميرة

أميرة: الو؟

هلال: انتي فين يا أميرة؟

أميرة: انا في الكافية من ورا

هلال: طب انا جايلك

أميرة: ماشي

هلال راح لاميرة

هلال: عملتي اي؟

أميرة: براحة بس كدا لما نروح
هلال :طب تعالى اركبك عربية وروحي انتي عشان
ماتأخريش

اميرة :لا انا هقعدهنا
هلال :طب خلي بالك من نفسك
اميرة :طيب ماتخفش
هلال :في رعاية الله
اميرة :في رعاية الله
طلع محمد وهلال المحاضرة.

حمزة راح يفطر عشان لسه مش عنده محاضرة
دلوقتي

وهو داخل الكفايه لقي بنت قاعدة في الاخر وفي
شباب داخلين الكفايه والبنت شكلها محترم جدا ف دا
اللي لفت نظره هي ليه قاعدة كدا؟

ف قعد قصاها من الناحية الثانية عشان محدش
يضايقها وطلب الاكل وفضل ياكل وبعد ماخلص لسه
البنت قاعدة والشباب قاعدين وهو خايف ليقوم ويسبها
لو حدها

حمزة لنفسه :وبعدين بقى هي هتفضل قاعدة كدا مش
هاينفع

طب وانت مالك ممكن تكون مستتية حد

بس مش هاينفع اسببها لو حدها كدا مش عارف انا
حاسس كدا ليه بس مش هاينفع اسببها انا هاستني
لغاية ماتقوم أو أي حد يقربلها يجي

وفضل قاعد لغاية حتى ما معاد المحاضرة بتعته جيه
وهو مش راح عشانها وبعد شوية لقي هلال داخل
بيكلمها وخذها ومشى

حمزة حس باحساس رخم لما شافها ماشية مع هلال

هلال خلص المحاضرة وراح اخذ أميرة ومشي
ومحمد روح مبسوط جدا
وفاطمة ونجمة نزلو يشتروا لبس لفاطمة
حمزة روح وحاسس انه متضايق لما شاف أميرة
ماشية مع هلال

هلال :ها عملتي اي معاها؟
أميرة :هو من اول مرة كدا ولا ايه بس اختك مش
ساهلة بردو
هلال :ماتقول يا أميرة بقى
أميرة :بص ياسيدي هي أول ماجبت سيرتك فضلت
تشكر فيك والله وانا حاسة انها يعني شبه موافقة بس
هي خايفة

هلال :انا عارف انها خايفة
أميرة :طب وانت ناوي تعمل اي؟

هلال :اثبتلها اني بحبها بس تديني فرصة بس وتوافق
عليا

أميرة أن شاء الله توافق عليك
هلال : يااارب

فاطمة ونجمة بعد ما شتروا اللبس
نجمة :مبسوطة؟
فاطمة :جدا والله

نجمة :يارب ديما تكوني مبسوطة
فاطمة :هاتعملي اي يا نجمة؟
نجمة :بكرا هنزل معاه عملي.

فاطمة:ايوة لازم تقرري وتردي عليه
نجمة:هاعمل استخارة وهارد عليه

فاطمة : طيب يا حبيبي وربنا يريح قلبك

نجمة :اللهم امين

فاطمة :يلا انا ماشية بقى

نجمة :في رعاية الله

فاطمة :في رعاية الله

حمزة فضل يفكر في البنت اللي كانت قاعدة في الكافيه وازاي هو اتشدلها كدا من غير مايشوفها هو شاف بس ان في بنت قاعدة لكن مش شافها اصلا وفضل يفكر هو متضايق ليه لما شافها ماشية مع هلال ف قرر يسئل هلال عنها بكرة

نجمة روجت البيت وسلمت على مامتها وحكتلها تفاصيل يومها قالتها انها هاترد على هلال بكرة والدتها :طيب يا حبيبتى اعلمي اللي يريحك
نجمة :أن شاء الله يا ماما

دخلت نجمة صلت وقرأت قرآن وفضلت تفكر في
الموضوع وبعدين صلت الاستخارة ونامت

هلال :بحبك والله يانجمة وعمرى ماهوجعك

نجمة :انا خايفة يا خلال

هلال : ماتخفيش وانتي ربنا معاكى وانا جنبك مش
هاسيبك بس ادينى فرصة

نجمة :بس مش عايزة أقرب من حد عشان انت
هاتسبنى انا متأكدة

هلال :ليه متأكدة كدا؟

نجمة :عشان انتوا كلكوا كدا وحشين وانانين.

هلال :بس انا عايزك

نجمة :عايزنى ليه؟

هلال :عشان اكون جنبك وماتخفيش ابدًا وعشان
اخليكي ديما سعيدة واخد ب ايدك للجنة يانجمة
انا بحبك والله

صحبت نجمة على أذان الفجر وهي بتعيط

فضلت تعيط وقامت تصلي الفجر وبعدين قالت
الأذكار وفضلت تفكر في الحلم دا..

نجمة لنفسها :انا حاسة اني مرتاحة بس مش عايزة
اظلمه معايا ولا أظلم نفسي انا مش عايزة أقرب من
حد انا عايزة ابقى لوحدي عشان عمر حد ما هيحبني
عشاني خلاص مش هاتعب نفسي اكر من كدا

تاني يوم هلال صحي من النوم وكان قلبه مقبوض
لأن النهاردة هايقابل نجمة في القسم وخايف من رد
فعلها ونزل راح المستشفى...

نزلت نجمة وراحت المستشفى ودخلت القسم ف قلت
هلال لما شافته قلبها دق جامد وبعدين هدت نفسها
وقالت

السلام عليكم ورحمة الله وبركاته

هلال :وعليكم السلام ورحمة الله وبركاته ازي
حضرتك يا آنسة نجمة

نجمة :الحمدلله

هلال :الحالة بتاعتك..

نجمة :بعد اذنك كنت عايزة اتكلم معاك في موضوع
الأول.

هلال :اتفضلي سامع حضرتك.

نجمة :اسفة يا استاذ هلال مش موافقة بس عايزة
أوضح لحضرتك حاجة انا مش موافقة عشان انت

مش كويس أو انا مرتبطة بحد لا انا ليا أسباب خاصة
لكن حضرتك محترم جدا واي بنت تتمناك
هلال :كنت أتمنى تديني فرصة واحدة يا نجمة
نجمة:اسفه انت زي مانت بالنسبالي اخ وصديق.
هلال :مش هبطل اطلبك من ربنا
نجمة وعيونها بدأت تدمع :بعد اذنك
ودخلت الاوضة بتاعت التمريض

هلال اول ما شاف نجمة حس انها مش موافقة بس لما
سمعها منها حس ان قلبه بيتكسر قدام عينيه بس هو
حاسس ان نجمة مش راضية عن القرار نفسه عشان
كدا هو مش هاييأس

لا تيأس ! ف والله ما بكت عين إلا وفوقها رب يخبئ
~لها الأجمال ♡

بعد ما خلص هلال ونجمة العملي راحو الكلية
دخل هلال الكلية وراح الكافيه لقي حمزة تقريبا كان
مستنيه.

حمزة :ازيك يا هلال

هلال :الحمدلله انت عامل اي

حمزة:الحمدلله بقولك انا شوفتك امبارح ماشي مع بنت
هي مين؟

هلال واستغرب :دي اختي في حاجة؟

حمزة وارتاح شويه وبعدين حس ان هلال حس
بحاجة :عادي اصلي استغربت يعني

هلال :يعني انا همشي مع بنت معرفهاش؟

حمزة :طب انا ممكن اطلب ايديها؟

هلال وهو متفاجئ :اي؟

حمزة :زي ماسمعت

هلال :هو انت كنت شوفتها ولا تعرفها؟

حمزة :والله ولا حتى شوفت وشها وحكاله على اللي
حصل وهو حاسس ب اي.

هلال وهو مبتسم :والله انا بجد ليا الشرف ان انت
تخطب أميرة وهبقي مطمئن عليها جدا معاك بس هي
لسه صغيرة

حمزة :الله على اسمها احمم اسف طب هي عندها كام
سنة

هلال :هي هاتتم ال 19 الشهر الجاي هي كبيرة سنة
تقريبا هي في تالته ثانوي

حمزة :طب ممكن أتقدم دلوقتي ولو خصل قبول نعمل
خطوبة بعدين

هلال :هكلمها وار د عليك بس انا موافق مقدما

حمزة وهو بيحضنه :ربنا يعمر بيتك يارب

هلال وهو مبسوط :يارب وان شاء الله هارد عليك
وان شاء الله خير

حمزة :يارب هستني ردك

هلال :أن شاء الله

مشيت نجمة وراحت الكلية وهي على وشك العياط
وأول ماشافت فاطمة انهارت عياط

فاطمة حضنتها وبعد ماخلصت عياط :مالك

نجمة :رفضته

فاطمة :انتي مرتاحة؟

نجمة :لا

فاطمة :طب رفضتية ليه؟

نجمة :عشان مش عايزة يكون فعلا بيحبني ويبعد
عني مش عايزة اتعلق بيه وبعدين قلبي يوجعني.

فاطمة :أدى لقلبك فرصة

نجمة :لا انا خايفة.

فاطمة :مش يمكن مايسبكيش؟

نجمة :لا مش معقول خلاص يافاطمة هما يومين

وهبقي كويسة وهنسي الموضوع

فاطمة :طيب المهم تكوني مرتاحة.

نجمة :طيب يلا نروح

وروحت نجمة وفاطمة

روح هلال البيت ودخل على أميرة اول

هلال بيخبط...

اميرة :ادخل يا خويا

هلال :قلب اخوكي عيوني أخوكي حبيبي عامل أي؟

اميرة وهي مزهولة :احم اي دا يا هلال انت سخن

ياحبيبي اعمالك كمادات؟

هلال :انا كويس يا حبيبي انتي اللي شكلك هاتقعي من

طولك كمان شوية

اميرة :يبقى نجمة وافقت عليك.

هلال وهو حزين :نتكلم في الموضوع دا بعدين

اميرة :خير يا خويا اشجيني.

هلال :جالك عريس يا صغنن

اميرة قامت من على السرير :لولو لولو لولي بصوت خفيف كدا

هلال :اهدي يامجنونة

أميرة :اهدي اي! وسع كدا يا ماما يا ماما

والدتها :اي يا بت عاملة دوشة ليه؟

أميرة :ابنك جايبلي عريس.

هلال :يا بنت الل والله يا ماما ماجبت حاجة هو اللي جيه.

والدتها :ماتهدوا كدا وفهموني

هلال :بصي يا حاجة أميرة كانت معايا في الكلية امبارح وفي واحد شافها من بعيد حتى مش شاف ملامحها واعجب ب ادبها ف تقدملها وهو كويس جدا وانا فعلا اتمنى ان أميرة توافق

والدتها :طب وانتي رايك اي يا أميرة؟

أميرة وخدودها احمرت :احم مش عارفة اللي تشوفه
يا هلال

هلال : او عا بقى اخيرا شوفتك مكسوفة

أميرة :احم انا داخلة اذاكر

هلال دخل وراها

هلال :انتي يا بت

أميرة :نعم

هلال :اقوله يجي وتقعديا مع بعض ولو ارتاحتوا

نعمل الخطوبة بعد الامتحانات؟

أميرة :اللي تشوفه

هلال :اي بت انا اول مرة اشوفك كدا

أميرة :ماتكسفينيش بقى يا هلال

هلال :ماشى يا جميل انت أن شاء الله هاتفق معاه على

معاد ويجي أن شاء الله

أميرة :ماشى يلا عشان اذاكر بقى

هلال :طيب ياختي

حمزة اول ماسمع أن أميرة تبقى اخت هلال فرح جدا
وهو مش عارف ليه بس لقي نفسه بيقله عايز
اتقدملها وبردو مش عارف ليه؟! بس لما لقي هلال
موافق فرح جدا وقلبه كان هايطير من الفرحة قال
بس هي دي حور عيني اللي كنت بحبها في خيالي
وبدور عليها وبقي يدعي من ربنا ان هي توافق..

نجمة روجت البيت وحكت لماتها كل اللي حصل
وهي زعلانة..

والدتها :طب انتي متضايقة ليه؟

نجمة :صعبان عليا وكمان انا مش مرتاحة بس حاسة
بردو لو وافقت مش هارتاح

والدتها :طب اهدي يانجمة وخدي وقتك تاني وفكري
براحتك

نجمة :أن شاء الله يا ماما

تاني يوم فاطمة نزلت من البيت اول مرة باللبس
الجديد وهي راحة للكلية

والدتها :بسم الله ماشاء الله يا حبيبي وشك منور وقمر
ربنا يثبتك يارب يا حبيبي

فاطمة :يارب يا ماما ادعيلي

والدتها :بدعيلك من كل قلبي والله

فاطمة :طب يلا في رعاية الله انا نازلة يا ماما

والدتها :في رعاية الله يا قلب ماما

صحي محمد من النوم واتصل لهلال وقاله هانفطر
سوا النهاردة في الكافية واتفقوا على كدا

صحي هلال وصلى ونزل الكلية

صحيت نجمة ولبست وصلت ونزلت الكلية

نجمة اول ماشافت فاطمة باللبس الجديد قلبها كان
هايطير من الفرحة

نجمة :اي دا اللهم بارك شكلك حلو اووي الله

فاطمة :بجد! انا مبسوطة جدا

نجمة :بجد وجداني كمان

فاطمة :فرحانة وحاسة اني فراشة ماشية كدا باللبس
الجميل دا

نجمة :ربنا يديم عليكى الفرحة يارب

فاطمة :انا وانتى يارب

نجمة :يلا تفطر الأول لحسن انا نزلت من غير
مافطر

فاطمة :اشطا وانا كمان جعانة

نجمة :يلا

ودخلو الكافيه عشان يفطرو

هلال وصل الكلية لقي محمد في الكافيه

هلال :ازيك يا ابو الصحاب

محمد :ازيك هلال

هلال :مالك؟

محمد :مفيش والله

هلال :متأكد؟

محمد :اه مصدع بس شوية

هلال :طب يلا اطلب الاكل

محمد قام عشان يطلب الاكل في نفس اللحظة فاطمة
كانت بتطلب الاكل وهو شافها بس هو غض البصر
عشان هو مش عايز يغضب ربنا
محمد طلب الأكل وجيه

هلال: يا بني مالك سرحان كدا ليه؟

هلال: محمد!

محمد: هاا

هلال: هاا؟

محمد: معلىش مش مركز

هلال: دانتي مش معايا خالص

محمد: معاك والله بس يلا ناكل

هلال: طب يلا

وفضل محمد يفكر فيها وهو ميعرفهاش بس حاسس
انه شافها قبل كدا حاسس انها خطفت قلبه ف قال مش
معقول اكون حبيتها بالسرعة دي!

محمد : هلال!

هلال : نعم.

محمد : هو ينفع حد يحب حد من اول مرة يشوفه

هلال وهو مستغرب : ايوه ينفع القلب لما بيشوف نصه
تاني اصلا بتحس ان قلبك بقى مش معاك وهي خدته

محمد : هي مين دي؟

هلال : اللي انت بتفكر فيها

محمد : عرفت منين؟

هلال : اسأل مجرب ومتسألش طبيب

محمد : طب ياخويا عملت اي في موضوعك

هلال : لسه ربنا يسهل

محمد : ربنا يسهلك اموري وامورك

هلال : يارب

هلال : صحيح حمزة طلب ايد أميرة اختي.

محمد : بجد طب وهو شافها فين؟

هلال :جت معايا يوم الكلية

محمد :وهو شافها كدا؟

هلال :هو مشفهاش اصلا وحكاله اللي حصل

محمد :ياسيدي طيب ربنا يتمم بخير

هلال :أن شاء الله انا هالكلمه النهاردة نحدد معاد
يجي البيت.

محمد :أن شاء الله

دخل حمزة عليهم

محمد :لو كنا جيبنا سيرة ربع جنيه مخروم كان زمانه
جيه.

هلال :لسه كنا في سيرتك بالخير طبعاً

حمزة :ماشى ياسيدي السلام عليكم ورحمة الله
وبركاته الأول

محمد وهلال :وعليكم السلام ورحمة الله وبركاته

حمزة :ازيكوا ياشباب

هلال ومحمد :الحمدلله بخير

حمزة :عايزك على انفراد

هلال :لا عادي دا محمد عارف كل حاجة

حمزة :طب يلا بسرعة اي الرد؟

هلال وماسك نفسه من الضحك :اي رايك يوم

الخميس الجاي تشرفنا انت وأهلك عشان نعمل رؤية شرعية..

حمزة وهو مصدوم :الحمدلله الف حمد وشكر ليك

يارب انا فرحان جدا

هلال وبدأ يضحك خلاص :لي يابني اهدي

حمزة :أن شاء الله الساعة كام بقى يوم الخميس؟

هلال :بعد العصر

حمزة :خلاص اتفقنا أن شاء الله

محمد فضل يفكر في فاطمة كثير ومش عارف هي
معاه في الكلية ولا لا وهي أكبر منه ولا قده

نجمة وفاطمة خلصوا فطار وطلعوا المحاضرة

محمد وهلال خلصوا فطار ودخلوا المحاضرة وكانت
نجمة وفاطمة جوا

محمد اول ماشاف فاطمة حصلتله حاجة كدة في قلبه
وابتسم تلقائي

هلال حصله نفس اللي حصل لمحمد بس هو قلبه
وجعه

لما هلال دخل نجمة حست انها عايزاه بس رفضت
الاحساس دا..

خلصوا المحاضرات بتاعت اليوم ومحمد وهلال
وحمزة قعدوا قاعدة كل يوم يتكلموا عن ربنا ويعملوا
حلقة استغفار ونجمة كانت بتاخذ بالها منهم ومستغربة
هما بيعملوا اي..

نجمة وفاطمة روحوا وهلال ومحمد وحمزة خالصوا
حلقة الاستغفار وروحوا

هلال دخل البيت وبينادي على أميرة.

هلال : أميرة

أميرة : ايوا

هلال : جهزي نفسك يا عروسة عشان الرؤية الشرعية
يوم الخميس يابطة

أميرة ووشها احمر : احم انا داخلة أزاكر

هلال :ياواد يا مكسوف انت.

ودخل هلال لوالدته يبلغها

هلال :يا أمي

والدته :ايوا يا حبيبي

هلال :حمزة جاي ان شاء الله يوم الخميس عشان

يشوف أميرة ونشوف هانعمل اي

والدته: على بركة الله يا حبيبي اعبالك

هلال :يارب يا امي ادعيلي

والدته :بدعيلك يا حبيبي

دخل حمزة على والدته وبلغها

حمزة :امي

والدته :ايوا يا حبيبي

حمزة :بصي يا أمي أنا أن شاء الله عايزك في

موضوع كدا

والدته :اي يا حبيبي

حمزة :انا عايز اخطب

والدته: ياريت والله طب انت شايف حد مناسب

حمزة :انا شفت اخت صاحبي وقولتله

والدته :وقالك اي؟

حمزة :قالي يوم الخميس الجاي تشرفنا انت وأهلك

والدته :اللي بعد بكر ا دا!

حمزة :ايوا يا أمي

والدته :مبارك عليك مقدماً يا حبيبي

حمزة :الله يبارك فيكي يا أمي

وباس رأسها ودخل الاوضه بتاعته

وجيه اليوم المنتظر يوم الخميس

والدة أميرة :قومي يا عروسة

أميرة :اي يا ماما بتصحيني ليه؟

والدتها :قوني ياختي وراانا حاجات كثير الضيوف
جاين النهاردة

أميرة :طب وانا أعملهم اي يعني؟

والدتها :قومي يابت بلاش دلع

أميرة :حاضر قومت اهو

حمزة كان منتظر اليوم دا بفارغ الصبر صحي
الصبح وراح عند الحلاق وجيه الكليه

هلال :اهلا يا عريس

حمزة :يسمع منك ياارب

هلال :أن شاء الله يحصل قبول ماتخفش

حمزة :يااارب او مال فين محمد

هلال : مش عارف شكله مجاش

حمزة :طب انا هروح عشان عندي محاضرة والحق
اخلىص اصل عندي معاد

هلال :ياختاي أميرة جننت الواد من قبل مايشوفها
او مال لما تشوفها هاتعمل اي؟

حمزة :ياعم إذا كان الجنان حلو كدا ف انا عايز
اتجنن

هلال :اتجننوا انتوا الاتنين اصلا شبه بعض

حمزة :طب يلا في رعاية الله

هلال :في رعاية الله

محمد دخل الكلية وسلم على هلال وفضلنا يتكلموا
شوية وبعدين دخلوا المحاضرة محمد كان بيدور علي
فاطمة عشان يطمئن عليها بس انها جت وشافها فقلبه
اطمن

نجمة وفاطمة كانوا وصلوا الكلية ودخلوا المحاضرة

خلصوا المحاضرة والكانت الساعة بقت اتنين ونص

أميرة لبست فستان كشمير وخمار سكري وكان شكلها
في قمة الجمال وكان فاضل نص ساعة ويجي

هلال دخل عليها

هلال :اي القمر دا بس!

أميرة :قمر من يومي يا حبيبي

هلال :يابختك ياعم حمزة

أميرة احمر وشها :ايوا طبعاً يابخته اني اتكرمت

ووافقت اقعد معاه

هلال :او مال مين اللي كانت بتصوت من الفرحة لما

عرفت ان جالها عريس

أميرة :مين دي مش انا خالص....

هلال :عفريت صح.

أميرة :طب وسع بقى عشان أجهز نفسي

هلال :او عدنا ياارب

اميرة:أن شاء الله ياخويا امشي بقى

هلال :ماشي ياستهم وباسها من راسها

بعد شوية الباب خبط..

أميرة :اكيد هما يا ماما انا داخلة

والدتها :ياهبله

هلال :اسكتوا وراح يفتح الباب

حمزة :السلام عليكم ورحمة الله وبركاته

هلال :وعليكم السلام ورحمة الله وبركاته ازيك

اتفضل يا حمزة اتفضلي يا امي

ودخل حمزة ووالدته.

والدة هلال دخلت :منورين

حمزة ووالدته :بنورك

وسلمت على والدة حمزة

فضلوا يتكلموا شوية وبعدين حمزة قال

انا يشرفني اني اطلب ايد أميرة اختك يا هلال

هلال :وانا يشرفني اني اناسب حد زيك واكيد هبقي

مطمئن على أميرة معاك

وبعد شوية أميرة دخلت..

أميرة باصة في الأرض وسلمت على والدة حمزة

وقعدت باصة في الأرض بس وقلبها بيدق جامد

اول ما أميرة دخلت حمزة بصلها وكان حاسس ان

ملاك ماشي على الأرض فضل باصصلها طول

ماهي قاعدة

بعد شوية خلال قال طب نقوم ونسيبهم يتكلموا شوية
واخد والدته ووالده حمزة وقعدوا في الاوضة اللي
قصادهم

فضلو ساكتين شوية لغاية ما حمزة قال

مش هاتبصيلي طيب

أميرة ابتسمت وفضلت ساكتة

حمزة :طب مش هاتسأليني اي سؤال؟

أميرة :بتصلي؟

حمزة :الحمدلله

أميرة :جماعة؟

حمزة :الحمدلله

أميرة :والفجر؟

حمزة :جماعة برودو

أميرة :حافظ كام جزء؟

حمزة :القرآن كله الحمد لله

أميرة :طيب.. أسأل انت

حمزة :انا سمعت من اخوكي لما حد بيعاكسك بتقفي
تهزقيه

أميرة :بصتله وقالت انا مش بعمل كدا

حمزة :ايوا انا عارف بس قولت كدا عشان تشوفيني
بس

أميرة ضحكت ورجعت بصت للأرض ثاني
حمزة :أميرة..

اميرة وقلبها كان هايقف:نعم

حمزة :تقبلي تتحوريني!

أميرة: سكتت ووشها جاب ألوان

حمزة: بس كدا يبقى السكوت علامة الرضا

فضل يسألها شوية أسئلة وهي بردو وبعدين هلال
دخل

هلال :نقول مبروك؟

أميرة وشها احمر جامد وسكتت

حمزة :انا بالنسبالي احلى مبروك بس نشوف العروسة

هلال :سيبلي العروسة انا هاعرف اشوف مبروك ولا لا

حمزة :أن شاء الله يكون مبروك

فضلوا يتكلموا واتفقوا لو حصل نصيب هایتخطبوا بعد الامتحانات

وبعدين حمزة وأهله روحوا

وبعدين هلال دخل لاميرة

هلال :حبيبي قاعد لوحده بيعمل اي؟

أميرة:مش بعمل حاجة

هلال :طب رايك اي؟

أميرة :في أي؟

هلال :يابت...

اميرة :اي ياهلال.

هلال :موافقة؟

أميرة :هاعمل استخارة

هلال :أمام بس انتي مرتاحة!

أميرة سكتت شوية :الحمدلله

هلال :يرحمكم الله

أميرة :يلا ياعم من هنا

هلال :خلاص ياحببتي ربنا يتمم على خير يارب

حمزة لما روح البيت سأل والدته عن رأيها في
أميرة.

والدته :بصراحة البنت محترمة وقمر وشكلها كويس
يارب تكون من نصيبك

حمزة :اللهم امين يا أمي

ودخل حمزة الاوضة بتاعته وفضل يفكر في أميرة
ويفكر في احساسه لما شافها وفضل يقيم الليل انها
توافق عليه

أميرة عملت استخارة وارتاحت وبلغت هلال وهلال
قال لحمزة

حمزة كان هايطير من الفرحة وبقي مش مصدق
وراح صلى ركعتين شكر لله

عدت سنة وفي السنة دي هلال ما بطلش يدعي أن
نجمة تكون من نصيبه وحبها في قلبه بيزيد يوم عن
يوم

محمد فضل محافظ على حبه لفاطمة في قلبه عشان
مش عايز حبه لفاطمة يخليه يعصي ربنا

حمزة كان مستني الامتحانات بتاعت أميرة تخلص
بفارغ الصبر عشان يخطبها واميرة كانت فرحانة انها
خلصت امتحانات عشان تتخطب لحمزة وكانت بتذاكر
كثير جدا عشان تدخل هندسة وفعلا جابت مجموع
الهندسة ودخلتها وهاتتخطب لحمزة خلاص

حمزة اتصل بهلال لما عرف ان أميرة نجحت
حمزة :السلام عليكم ورحمة الله وبركاته ازيك يا
هلال!

هلال :وعليكم السلام ورحمة الله وبركاته الحمدلله
ياحمزة انت عامل اي؟

حمزة :بخير الحمدلله

هلال :يارب ديما تكون بخير

حمزة :اللهم امين واياك مبرووك لاميرة

هلال :الله يبارك فيك مبروك لنا ولا اي ما حنا
نجحنا احنا كمان.

حمزة :مبروك يا عم المهم هانعمل الخطوبة امتي؟

هلال :مستعجل انت اوي

حمزة :اه والله

هلال :طب تعالى النهاردة نحدد معاد

حمزة :تمام ان شاء الله بعد العصر هاجي

هلال :تمام مستنيك

حمزة :أن شاء الله يلا في رعاية الله

هلال :في رعاية الله

هلال دخل لاميرة وبلغها أن حمزة جاي عشان

يحددوا المعاد

وحمزة جيه والمعاهد تتحدد أن الخطوبة يوم الجمعة

في البيت هنا

أميرة اتصلت بنجمة عشان تعزمها
نجمة :السلام عليكم ورحمة الله وبركاته
أميرة :وعليكم السلام ورحمة الله وبركاته
نجمة :ازيك يا أميرة عاملة اي وحشاني
أميرة :الحمد لله بخير والله وانتي كمان وحشاني جدا
نجمة :اي عملتي اي سمعت ان النتيجة ظهرت
اميرة :ايوة وجبت مجموع الهندسة
نجمة :مبارك يا حبيبي
اميرة :الله يبارك فيكي كنت عايزة اعزمك على
خطوبتي ولو ماجتيش والله لزعل
نجمة :مبارك عليك يا احلى أميرة اكيد ان شاء الله
جاية انا اقدر ازعل القمر دا مني!
أميرة :يا حبيبي تسلمي أن شاء الله ي م الجمعة بعد
العشاء

نجمة :أن شاء الله يا حبيبي ربنا يتم بخير

أميرة :اللهم امين

نجمة :عايزة حاجة يا حبيبي؟

أميرة :سلامتك يا جميل

نجمة :في رعاية الله

أميرة :في رعاية الله

وبعدين أميرة اتصلت ب فاطمة وعزمتها

وهلال اتصل بمحمد عزمه

هلال :السلام عليكم ورحمة الله وبركاته

محمد :وعليكم السلام ورحمة الله وبركاته

هلال :اي يا عم واحشني

محمد :وانت اكثر والله يا هلال

هلال :طب أن شاء الله هاتيحي يوم الجمعة خطوبة
البت اميرة

محمد :الف مبروك يا هلال اعبالك
هلال :الله يبارك فيك

محمد :خلاص تمام ان شاء هاجي
هلال :أن شاء الله

وبعدين محمد قفل مع هلال لقي حمزة بيتصل عليه
وعزمه

وجيه يوم الجمعة والانوار متعلقة على البيت
والأغاني الإسلامية شغالة

وهلال مايعرف أن نجمة جاية واميرة كانت عملاها
مفاجأة لهلال بس كدا كدا الفرح إسلامي..

نجمة اتصلت بفاطمة واتقابلوا وراحوا الخطوبة
وهما طالعين كان هلال نازل هو ومحمد

هلال اول ماشاف نجمة قلبه دق جامد وبقي مش
عارف يعمل اي كان نفسه يروح يقولها فكري ثاني
لما شافها قلبه وجعه وكانت عينه بتدمع بس بص في
الأرض ووسع الطريق

محمد لما شاف فاطمة فرح جدا لأنها كانت وحشاه
جدا وهو ماكنش يعرف اسمها حتى اتبسط انه اطمئن
عليها بس

نجمة اول ما شافت هلال قلبها دق جامد وكانت في
موقف محرج جدا وكانت عايزة تلف وترجع ثاني بس
كانت مبسوطة انها شافته تظمن عليه بس كان جواها
صوت بيقولها ماتسمعيش كلام قلبك.

وبعد ماطلعوا محمد سأل هلال هي مين اللي مع نجمة
دي يا هلال؟

هلال :دي فاطمة صاحبته

وبعد شوية حمزة وصل

أميرة كانت فعلا شبه الاميرات كانت لابسة فستان
سماوي منفوش شوية صغيرين ولابسة خمار نفس
اللون وكان شكلها أميرة حقيقي..

اول ماسمعت أن حمزة جيه قلبها دق جامد بس كانت
فرحانة اووي

وبعدين والدة حمزة جت ولبست لاميرة الشبكة
وبعدين نجمة واميرة وفاطمة فضلوا يرقصوا مع
البنات وبعدين نجمة وفاطمة قالوا إنهم هايمشوا
وسلموا على أميرة وروحوا

كانت الساعة 11 ونص

وهما نازلين طبعا كان هلال ومحمد تحت ف هلال
شافهم

هلال :محمد

محمد :نعم

هلال :نجمة وفاطمة مروحين والوقت متأخر انا مش
هاينفع اسيب الناس واروح وراهم ممكن تروح انت!

محمد :اكيد ماشي

هلال :طيب يلا وماتخلهمش ياخدوا بالهم منك

محمد :تمام

ومشي محمد ورا نجمة وفاطمة وبعدين نجمة دخلت
بيتها وبعدين فضل يمشي ورا فاطمة لغاية ماوصلت
البيت وهو اطمن انها طلعت البيت وحفظ طريق البير
كمان

تاني يوم محمد راح بيت فاطمة لقي والدها اللي فتح
الباب

والدها :مين حضرتك

محمد :مممكن اخذ من وقت حضرتك دقيقتين..

والدها :اتفضل

محمد :انا زميل فاطمة في الكلية هي ماتعرفنيش
خالص بس انا بصراحة أعجبت باحترامها وتربيتها
ف سألت على البيت وجيت قولت ادخل البيت من بابه
وكنت جاي اتفق مع حضرتك لو موافق اجيب اهلي
واجي

والدها:والله يابني انا أعجبت ببيك جدا لأنك شاب
شكلك محترم ودخلت البيت من بابه واكيد تشرفنا انت
وأهلك في المعاد اللي يناسبك

محمد :بكرا لو حضرتك معندكش مانع

والدها :اتفقنا أن شاء الله بكرا

محمد :بشكرك جدا ياعمي

والدها :الشكر لله يابني

ومشي محمد وهو طائر من الفرحة وراح بلغ والدته
وطبعا هي مصدقت أن ابنها هاخطب

والد فاطمة دخل الاوضة بتاعتها

فاطمة :اتفضل يا بابا

والدها :ازيك يافاطمة

فاطمة :الحمدلله يا بابا

والدها :في شاب جيه النهاردة عشان يتقدملك وهو
جاي هو وأهله بكرة عشان نتفق وشوفوا بعض وعلى
فكرة هو زميلك في الكلية

فاطمة وهي مصدومة :ماشى يا بابا

والدها :ماشى يا حبيبتى جهزي نفسك بقى والشاب
محترم جدا انا عمناً موافق عليه ناقص انتى بس

فاطمة :اللى فيه الخير يقدمه ربنا يا بابا

والدها :ماشى يا حبيبتى

فاطمة :هو اسمه اى طيب!

والدها :محمد

فاطمة :طيب

والدها :فرحك أن شاء الله قريب

فاطمة :اي يا حج عايز تخلص مني ولا اي؟!!

والدها :لا يا حبيبي عايز افرح فيكي.. اقصد افرح بيكي

فاطمة :ماشي يا حج يلا روح قول بقى للحجة

والدها :من غير ماتقول كنت رايح اقولها

فاطمة :ماشي يا حج

فاطمة اتصلت بنجمة على طول واقتلتها

نجمة :مبروك مقدماً يا حلوة اخيرا هافرح فيكي

فاطمة :كدا يا نجمة..!

نجمة:بهزر يا حبيبي المهم انتي اعلمي الاستخارة

وشوفي هاترتاحي ولا لا وأنا معاكي ماتخفيش

فاطمة :أن شاء الله

تاني يوم محمد بيجهز عشان يروح لفاطمة وهو
بيدعي أن اليوم يعدي على خير وفاطمة توافق عليه..

فاطمة جهزت ولبست فستان نبيتي وخمار كشمير كان
شكلها حلو جدا جدا

وبعدين ماماتها دخلت واقلتلها يلا عشان الناس جت

فاطمة :اي! طب ثانية بس

والدتها :يلا يابنتي بقى الناس قاعدة بقالها شوية مع ابوكي

فاطمة :طيب انا جاية اهو

ودخلت فاطمة وسلمت على والدة محمد وقعدت وبعد شوية والدها قال :طب نقوم بقى ونسيبهم مع بعض شوية

وبعدين قاموا وقعدو في الصالون اللي قصادهم محمد :ازيك يا انسة فاطمة

فاطمة وهي باصة في الأرض :الحمد لله

محمد :مش عايزة تشوفيني طيب!

فاطمة ورفعت عينيها شوية :احم اه شوفتك

محمد :طب اي رايك؟

فاطمة :في أي!

محمد :فيا قمر مش كدا!

فاطمة بصوت خفيف لكن محمد سمع :قمر بالستر
ياخويا

محمد وهو بيضحك :طب اي مش هاتسألني اي حاجة!
فاطمة :انت تعرفني مين!

محمد :بصراحة اول مرة شوفتك فيها كنتي بتجيبني
اكل من الكافية بتاع الكلية
فاطمة :وعرفت بيتي منين!

محمد :اللي يسأل مايتوهش
فاطمة :تمام

محمد :اسأل انا!
فاطمة :اتفضل.

محمد :ناوية تسمى ولادنا اي؟!
فاطمة :نعم!

محمد :زي ماسمعتي كدا
فاطمة :انت واثق كدا اني أوافق عليك!

محمد :وماتوا فقيش عليا ليه؟! دانا حتى واد حليوة
والبنات كلها تتمناني

فاطمة :خلاص ياخويا روح اتجوزهم

محمد :بس انا عايزك انتي بس..

فاطمة سكتت ووشها احمر

محمد :طيب الحمد لله عرفت هاسكتك ازاي بعد كدا

وفضلو يتكلموا شوية وبعدين والدها دخل

والدها:ها خلصتوا!

محمد :اه اتفاهمنا ولا اي يا فاطمة!

فاطمة :اه ظريف جدا..

محمد وهو بيضحك : شايف بنتك يا عمي

والدها وهو بيضحك :انت اللي اختارت انا مليش

دعوة استحمل بقي

محمد :يا عمي انا استحمل اي حاجة بس هي توافق

بس وانا اشيلها جوا عيوني

والدها :رايك اي يا فاطمة!
فاطمة ووشها احمر اوي :هعمل استخارة الأول يا بابا
والدها :تمام لنا تعمل استخارة هارد عليك يا محمد
محمد :مستني ردك يا عمي
والدها :أن شاء الله خير

وفضلوا يتكلموا شوية وبعدين محمد وأهله روحوا

فاطمة كانت فرحانة اووي وهي قاعدة معاه حسست
انها تعرفه بقالها كثير وان هو هايخد ب ايدها للجنة
اتصلت بنجمة وحكتلها على كل اللي حصل
وعملت الاستخارة وارتاحت وبلغت والدها ووالدتها
بلغ محمد

ومحمد جيه واتفقوا انهم هايخطبوا الأسبوع الجاي
محمد بقى فرحان جدا وقال لهلال

هلال :بجد انا مبسوط جدا والله ربنا يجمعك بيها على
خير

محمد :اللهم امين واعبالك ياارب

هلال :يارب يارب

محمد :أن شاء الله ربنا هايستجيب ليك

هلال :أن شاء الله

وفاطمة اتخطبت لمحمد

بعد 6 شهور

النهاردة كتب كتاب فاطمة ومحمد

فاطمة كانت لابسة فستان روز خفيف وكانت لابسة
خمار لونه كان شكلها في قمة الجمال

ونجمة كانت معها من اول اليوم وكانت لابسة فستان
احمر جميل جدا وخمار لونه كانت حلوة اووي
ومحمد كان فرحان جدا وهلال كان معاه
بعد كتب الكتاب محمد راح حضن فاطمة وقالها
ربنا رضاني بيكي

فاطمة: ربنا يقدرني واقدر افرحك على طول يا محمد
محمد: كنت بحبك من اول يوم شوفتك فيه وفضلت
حابس مشاعري عشان ربنا يراضيني وتبقى من
نصيبي ومغضبش ربنا فيكي انا بحبك ايوا بس حب
ربنا أكبر

بحبك يا فاطمة

فاطمة ووشها احمر: وانا كمان

محمد: وانتي كمان اي!

فاطمة: وانا كمان كدا

محمد: كدا اي عايز اسمعها

فاطمة: بحبك يا محمد

محمد حضنها جامد ولف بيها وكانت الفرحة مش
سايعاهم

نجمة كانت فرحانة جدا أن فاطمة فرحانة بالشكل دا
وكانت مبسوطة اوووي

وبعدين شافت هلال قلبها وجعها لما شافته بيعيط وهو
لأول مرة تشوفه وهو كان بيصلها وهي فرحانة
شافته وهو بيعيط

قلبها وجعها جامد كانت عايزة تروحله وتقوله او عي
تعيط انا قلبي وجعني والله انا غلطانة اني اخليك تعيط
انا أنانية والله انا اسفة

فضلت اقول الكلام دا كده بعينيها ليه

بعد ما اليوم خلص تاني يوم نجمة صحيت من النوم
لقت هلال قاعد في الصلاة مع مامتها طبعا هي شافته
لكن هو مش شافها

بعد ما مشي نجمة سألت مامتها هو جاي ليه!

والدتها :جاي يتقدملك

نجمة :وانتي قولتيله اي؟

والدتها :قولتهله انك مش موافقة

نجمة :بس يا ماما

والدتها :بس اي!.

نجمة :كنت ممكن افكر

والدتها :لا انتي فكرتي قبل كدا دلوقتي قولي يا اه يا لا

نجمة :اه يا ماما

والدتها :يعني أبلغه انك وافقتي!

نجمة :لا انا اللي هابلغه

والدته :طيب ياختي كان لازم نتقلي اوي كدا

نجمة :بس بقى يا ماما

نجمة اتصلت ب أميرة وقالتلها تقول لهلال أن نجمة

عايزة تقابله

واتفقت معاها ع المكان وهي هاتيحي معاها

ولبست نجمة ونزلت تقابل هلال واميرة

دخلت الكافية كان هلال قاعد هو وأميرة

نجمة سلمت على أميرة وحضنتها

اميرة :هاروح الحمام واجي

نجمة :ماما قالتلي انك جيت البيت

هلال :ايوة دا حصل

نجمة :انا موافقة

هلال :احلفي

نجمة :والله

هلال :قولي كدا تاني انتي بتهزري صح

نجمة وهي بتبتسم :ايوة والله وافقت ولا ارجع في

كلامي!

هلال :لا ترجعي هو دخول الحمام زي خروجه بصي

انا هاجيب المأذون بكرا واجيلك

نجمة :اي دا كدا على طول!

هلال :ايوة عشان اقولك على كل حاجة براحتي.

نجمة :احم طيب يلا انا همشي بقى

هلال :استنى اوصلك

نجمة :مفيش داعي

هلال :لا بقولك اي اسمعي الكلام احسلك انا مصدقت

نجمة وهي بتضحك :ماشي

تاني يوم كان كتب كتابهم والكل مش مصدق بس الكل فرحان

نجمة كانت نجمة حقيقي كانت لابسة فستان ابيض

منفوش صغير كدا وكان شكلها جميل جدا

هلال كتب الكتاب

وأول حاجة عملها شال نجمة ولف بيها وقالها كنت

خايف ربنا يعاقبني فيكي والله يانجمة انا بحبك من

ساعة اول يوم شوفتك فيه كنت بدعي ربنا انه يهديكي

من قبل ماتغير طريقة لبسك انتي حلم ربنا حققهولي

او عدك يانجمة اني هكون ليكي زوج وأب وأخ بس
انتي اديني فرصة وافتحيلي قلبك

نجمة :هاتحافظ عليه!

هلال :هاشيله جوا عيوني

نجمة :هاتسبني!

هلال :هافضل ماسك فيكي لغاية الجنة

نجمة :على فكرة انا بحبك عشان كذا كنت عايزة ابعده
عناك كنت خايفة اتعلق بيك وتسيبني عشان كذا مش
كنت عايزة اتكسر تاني

هلال :انا عمري ماهفكر اكسرك انا بستقوي بيكي.

نجمة :هاتستغل ضعفي!.

هلال :هاقويكي

طيب انا هاحكيك على حاجة كنت ناوية احكيها للي
هيكون من نصيبي

وانا عندي 16 سنة كنت فاكرة نفسي بحب واحد

بس طلع مش حب كنت حابة الأهتمام بتاعه بس

هو كان بيحبني بس كذب عليا وخذلني بس انا
بحمدربنا اني فوقت وعرفت اني كنت غلط عشان كدا
مش كنت عايزة اظلمك معايا تبقى انت عقاب ربنا
عشان عملت الغلط دا كنت خايفة تطلع زيه

انا اسفة اني دخلت حد حياتي قبلك

هلال :وانا فخور أن ربنا رزقني بزوجة زيك بحبك
يانجمة وعايزك تنسى كل وجع في حياتك
نجمة :بحبك يا هلال..

وفي الفرح نجمة انتقبت وكانت المفاجأة لهلال وكان
فرحان بيها جدا
ونجمة اتجوزت هلال...

ويعوضك الله بشخص يشبهك، يشبه نقاء قلبك
وإستحقته ♥.

تمت بحمد الله

❦ لا تستعجل أمراً رجوت الله به خيراً الله آتاك به فلا تقلق..

